

L'instrucziun bilinga fa progress

■ (gsc) L'Associaziun per la promoziun da l'instrucziun bilinga en Svizra (www.plurilingua.ch) è sa radunada dacurt tar la **Scola auta pedagogica vadaisa (SAP) a Losanna per ses 17avel colloqui annual e sia radunanza generala. Rectur Guillaume Vanhulst e cuss. gov. Anne-Catherine Lyon han beneventà las var 45 persunas.** Plis referats davart situaziuns concretas en citads e chantuns han palesà ils progress cuntanschids da l'instrucziun bilinga dapi l'entschatta dal tschientaner. Parsura Christine Le Pape Racine, docenta da didactica dal franzos a la SAP da la Svizra dal nordvest a Soloturn, ha referì davart las classas bilingas (franzos e tudestg) da scolina e da scola primara a Bienna cun immersiuin vicendaivla; la terza part dals uffants deriva da famiglias immigradas e discorra pia auters linguatgs. Sandra Schneider (Sion), dal Departament vallesan d'educaziun, cultura e sport, ha referì davart ils postulats vuschads dal cussegl grond areguard l'instrucziun dals dus linguatgs chantunals. Ins pina ina lescha da scola a favur da la bilinguitad. Ussa fan 3000 scolaras e scolars dal Vallais

part d'in program da barat. Quai munta ina scolaziun pretensiusa per la magistraglia da franzos davent da la terza classa; ins prevesa dudesch dis, ma la referenta manegia ch'ins dovria lura daplì. Docenta Régine Roulet (SAP dal Valais) ha referì davart la scolaziun e furmaziun cuntinuada da la magistraglia areguard l'instrucziun da l'auter linguatg chantunal. Davart il chantun Friburg ha referì Imelda Müller, collavuratura pedagogica per ils linguatgs tar la Direcziun d'educaziun, cultura e sport. Il chantun pina projects pilots da bilinguitad a Murten e Bulle. 2012 duain ins crear classas bilingas, ed ins lavura davart ina nova lescha da scola. Viceparsura Claudine Brohy (Universitad da Friburg), en contact dapi blers onns cun la SAP da Cuira, ha referì davart la situaziun ordvart complexa en noss chantun ed ils problems chaschunads t.a. dal rumantsch grischun e da l'introducziun da l'englais. Igl era pia ina dieta multifara che ha furnì ina buna survista da las stentas per approfondar l'instrucziun da las duas principalas linguas naziunals. La proxima radunanza generala ha lieu ils 24 da november 2012.